

山左金石志

山左金石志卷第十九

孫傳鼎都察院右都御史總督湖北湖南等處地方兼理糧餉山東巡撫加三級

同撰

內閣學士兼禮部郎中曾慶楚 齊河州知州提舉文書學政前山東學政加三級

金石上

重修兗州宣聖廟碑

天眷三年十月立正書碑高六尺五寸廣二尺五寸在兗

州府學

重修兗州宣聖廟碑

登仕郎崔先之撰

州學錄張待

問書并篆額

皇綱鼎固鳳麻殘運歲在上章浹灘月次圍陽拙魄既交

同知泰寧軍節度使趙公

謙牧作新

宣聖廟於魯城之裏維卽兗海觀察使劉公

宮

所卜之舊址也

魯邦 孔子之鄉 廟祀之嚴其來遠矣粵自唐大中十三

年歲次己卯劉公始擇茲地以遷作之更諸爽塏以就文明之

方也後一百七十七年至宋景祐三年歲次丙子 孔子四

十五世孫龍圖公道輔衣黻錦之榮來守鄉郡復革弊陋而增

崇之自景祐逮今又一百五年 公被

命臨鎮來充凡二百八十二年之間或以功勳而授鉞或以道

藝而分符牧守之賢不爲不多矣知宗儒尊道以報本反始崇

敬 宣尼畱意 廟貌者前有觀察劉公後有龍圖孔公

孔公卽以其孫而崇 祖廟未若劉公之誠也比之劉公挺然

特見于今者其惟 我公之賢乎 公世居幽都碩儒繼

代幼舉神童壯登桂籍聲名烜赫竦動四方其敦本重道之誠

出於天性景慕 孔聖以見願學之心焉

朝廷簡拔有德撫綏疲瘵之民爰自下車講求民瘼攘剔姦蠹
化洽千里威震一郡俗安其訓吏畏其明未及朞月閭境大治
乃臨黌舍延見諸生顧瞻堂室頽頽口口發風雨弗除函丈之間
凝塵滿席喟然嘆曰亂世則學校不修魯有泮宮頌美於詩時
底清平忍視其壞經之營之鳩工僇材不日而成潭潭之宇敞
然爲弦誦口口之地使芹莠可得而采焉恭謁

宣聖廟庭荐歷兵凶之後殿廡摧仆椽棟橈折瓦級破缺丹楹
漫漶尤加措意語人曰孔子之道澤及萬世教行八荒生
於魯仕於魯死而葬於魯師口口貌之立崇構華麗宜爲四方
之壯觀學其道而爲其徒者是爲我師也廟貌弗飾將何以
見崇奉恭敬之心哉遂擇日肇造親出俸入之餘以備費用躬
自督責口行不倦口飭匠氏量徑輪視廣袤乃董役夫供板築

奮作興基址不移繩墨不改木無衣綈錦土無被朱紫上棟下
宇右平左城煥然一新脩廊廣廡膠葛崢嶸春秋□□禮儀卒
備可以陳簠簋可以列豆籩可以鏘環珮可以奏磬筦升降周
旋無適不宜則 公之勤誠志嚮於此可見矣嗚呼美哉魯
之諸生瞻載色載笑之容□□□□言之教咸願頌 公之
德刊諸堅石以傳永久少効瓊瑤之報俾先之敘其事而爲其
文自願淺陋何足以發揚 公之懿謹紀其實而爲之辭以
遂邦人之願焉其辭曰

皇流共貫車書混同洙泗教揚八遐遂通 宜尼道行天下

爲公光于四方昭明有融 我公願學昌時先覺賢冠斗南

名重燕口臨鎮魯邦澤潤優渥樂善不倦爰苦 孔卓旣修

泮宮 魯侯之功薄采其芹回也屢空閭閻秋□□零之風

春誦夏絃教施無窮作 廟奕奕尊崇 聖德報本反始其

儀不忒匪刻匪雕旣華旣飾 廟貌斯口 魯侯之力以享

以祀神之聽之工師告成頌美於斯其頌維何金石可勒光施
前人垂之罔極

從仕郎兗州司法參軍兼權州學教授李挺立石 胡寧鐫字

右碑篆額失拓文及題銜凡二十五行字徑八分不著年
月但云歲上章渚灘月次國陽朏魄旣交又云自景祐三
年逮今又一百五年案景祐三年丙子越一百五年庚申
在宋爲紹興十年其時兗州已屬金人是爲金之天眷三
年也趙謙收金史無傳府志宦蹟亦遺之

定光禪師塔銘

皇統二年十月立正書篆額石高六尺四寸廣三尺四寸

五分在長清縣靈岩寺

右碑額題定光塔銘橫列四字徑五寸文三十四行字徑七分撰文者濮陽李魯書丹者濟南高鯉篆額者儒林郎行臺大理寺丞韓淦立石者起復昭武大將軍陝西諸路轉運使劉益武虛谷云行臺之制以別於中臺天眷三年移置汴京皇統二年定行臺官品皆下中臺一等然則此題大理寺丞降於正六品故書階儒林郎僅依從七品之下此皇統新制也又攷百官志轉運陝西有東西路地里志天德二年京兆府置陝西東路轉運司平涼府置陝西西路轉運司此當皇統二年陝西轉運猶未分東西也故劉益結銜以諸路舉之

妙空禪師塔銘

皇統二年立正書篆額石高三尺廣二尺八寸在長清縣靈岩寺

右碑額題妙空禪師塔銘三行字徑四寸五分文二十七行字徑八分祇存上截末行存皇統二三字乃立碑之年也

白雲菴禮塔會記

皇統三年四月立并額俱正書碑高四尺廣二尺三寸在歷城縣龍洞報恩塔側

右碑額題白雲菴主慶八十禮塔會碑記六行字徑一寸五分文二十行字體大小不等

妙空長老自題像贊石刻

皇統三年八月刻行書石高二尺廣一尺八寸在長清縣

靈岩寺

拙頌奉別 知事頭首兼 雲堂諸禪衆 住山淨如拜呈
七年林下冷相依自愧鋤刀利用微聚散莫云千里遠輸天一
月共同暉

慈雲記寫予真求讚漫書此以塞來意

眉不脩疎頭突兀鼻聾垂分額無骨長憐百醜兼且訥慈禪、
不我拙名兮邈兮水裏月咄

宣和五年八月初三方山老拙書

妙空老師嗣法薦福英和而出於大宗師門下兩坐道場僅四
十載凡示徒貴機用唯棒喝可語言知客道德獲此二頌囊之
久矣師今示家命工摹石益傳不朽皇統三年中秋日監寺僧
義由謹記

右詩贊十一行字徑一寸後刻義由跋三行正書字徑五分

沂州普照寺碑

皇統四年十月立正書碑高一丈一尺八寸廣四尺五寸
在蘭山縣治西南普照寺

中□□□□尚撰 伊川□□曄篆額

琅邪之佛祠在郡治者凡六區其五爲毗尼其□爲禪那今普
照□□當子□之西南有□臺巍然出於城隅臺之西□□□
□□□□焉耆舊相傳臺□曬書池曰澤筆其地蓋東晉右將
軍王羲之逸少故宅也昔晉祚中缺元帝渡江臨沂諸王去亂
□遷乃捨宅爲□□世祀縣邈眞僞莫考□歲嘗得斷碑於土
中□雖漫滅尚髣髴可讀按招提復興之代實自後魏至有唐

孝明皇帝卽位之九年始賜額曰開。宋崇寧初輔臣。請
詔天下每郡擇一寺一更爲禪林。遇聖上延祚之月爲祈延
景命之地。制從之。郡開元應選。自是改稱天寧萬壽禪寺。逮
廢齊居攝。專用昔政理國知衆。狹中多忌。凡浮屠老子之
居。裝日所嚴奉以祈福者。一切革。遂易天寧之號。榜普照。
開元遺址。因古臺爲基。下偪闔闔棟宇偏。當有
皆廢缺。不稱寶坊。制歲在丁巳。妙禪師覺海始來
任持。院之四年。乃議改作。衆懼難成。姑欲因陋經始之初。異
論起。手旁觀待其自具。師先定屹如山。終不可搖。
奉國上將軍渤海高公召和式適守是邦。與師昔於過去劫在
無量佛所會。因至是機緣會遇。針芥相投。公命首墮雉堞。
以達蔽阻。又架石爲梁。跨望月湖南。臨廣路於指顧間。已盡闢。

湫隘爲空曠之境矣復召百工授以□□自當陽聖位次及方
丈下逮童隸所偃息皆標立區所期盡新之益出已資力往給
經費且示苦忍降服偷情奢鋪斤斧所嚮輒以身□於是郡人
感其誠莫不風靡遠方植施亦破慳捨墮助作大緣憧憧往來
相踵於路以故費用□益□無其□寒暑未幾悉滿初願師又
於大雄殿之北□□□履聚竺土所傳調御所說五千四十八
卷之經爲大轉輪藏發機於地棲甌於輪鏤此岸旃檀諸□□
須彌山及阿耨池八方龍鬼出於□際冬持金革視護法相諸
□寶宮彌覆其上一一天宮有諸寶欄楯一一欄楯有諸寶□
女執妙音樂歌舞讚佛復有無量□□如來坐□□座爲百億
天衆放光顯瑞說無言法機輪一動聖凡出沒千變萬化金碧
相錯耀人心目如劫初時風激水□湧爲七珍蓮華藏世界不

可說宮殿又□□成微妙窮巧工告訖事□擇九月辛未集山
東十八郡之大長老洎傳戒宿德建龍華會七晝夜以落其成
幢蓋鍾鼓填溢衢市縑素萬人遐迩咸會都是勝相皆讚歎□
喜請採石斷碑紀述希有傳信無窮求文於中陶仲汝尚以記
其事汝尚曰先佛世尊□□□□□□□□東漢二葉教流
震旦訖於梁氏始宏闢有爲□□空術盡成名相我達摩初祖
自天竺西來救其末流俾涅槃妙心巍巍堂堂猶星□月益光
輝□像法自此天下之言禪者皆以明道說理爲宗不泥教律
惟師□□西蜀乘萬金之產來爲沙門親近知識求無上道叅
承咨決已得法要固當高提祖印直指人心乃建塔廟嚴像設
同二乘小果希人天福報此禪流後學所以竊議致疑於師也
然汝尚嘗聞師之言曰實際理地不受一塵佛事門中不捨一

法吾以如幻三昧遊戲世間雖化大千盡爲佛刹其中寶供最勝第一種種具足吾之妙口未始有作也昔眞際之住東院不聽大檀越動一口以廣其居是誠古佛用心然不口爲叢林法吾懼末世比邱喜虛誕者競爲大以欺佛遂有假如來衣竊信施口親法字之成壞若行路之過逆旅曾不介意或問其故輒謬曰古之人固如是也以至上雨旁風口壓是虞乃挈鉢囊遠巡省法有如諸方建化率由此轍則寶莊嚴道場往往鞠爲茂草如奈遺法其能久住世乎敢畏多言汝尚唯唯乃序寺之廢興緣起俾刻石以告來者時皇統四年十月二十日記

奉國上將軍行沂州防禦使事兼管內安撫使統押沂海路萬口兵馬高 召和式 沂州普照禪寺住持傳法賜口口口

大師覺海立石

右碑篆額未拓文二十四行字徑一寸三分錢辛楣少詹
云碑集柳誠懸書幾欲亂真與懷仁聖教序可謂異曲同
工楨字右旁缺筆避金熙宗諱也武虛谷云右碑斷裂書
撰人名氏僅有中尚二字可辨篆之文內所載知爲中陶
仲汝尚也于氏作齊乘去金未遠其載此碑猶全具然亦
約舉其云當子城西南有古臺西有廢池者舊相傳臺曰
曬書池曰澤筆東晉王右軍故宅也往歲得斷碑于土中
謂招提復興于後魏唐賜額開元宋崇寧初詔改爲天寧
萬壽禪寺逮廢齋居攝專用苛政理國知衆不附尤狹中
多忌凡浮屠老子之居一切廢革遂易天寧爲普照云今
案碑皆與相符後題銜奉國上將軍行沂州防禦使事兼
管內安撫使統押沂海路萬戶兵馬高召和式卽與覺海

復葺此寺者也金史廢帝紀正隆四年十二月乙卯以樞密副使張暉爲尚書右丞歸德尹致仕高召和式起爲樞密副使又高彪傳彪本名召和失辰州渤海人爲武寧軍節度使頗黷偵嘗坐賊海陵以其勦舊杖而釋之改忻州防禦使以碑證之忻當作沂傳刻誤也其階奉國上將軍及兼官傳皆遺之

傳大士梵相十勸石刻

皇統六年八月刻正書石高二尺一寸廣一尺三寸在長清縣靈岩寺

右碑上層刻傳大士畫象下層刻十勸詞及年月凡十四行字徑五分

心經石刻

皇統六年十月立正書石高四尺廣一尺六寸在濟寧州
晉陽山大張翟村

右刻未見拓本據朱朗齋所錄載之石分三層上層鐫佛
象題如來二字兩旁刻皇帝萬歲重臣千秋八字中層刻
心經一卷下層刻記文五行後列先祖及已身子女姓氏
大意立經碣於墓林以祈福祐者惜姓名皆泐不能知爲
誰氏之墓矣

任瀛靈岩寺詩刻

皇統七年三月刻行書石高一尺一寸廣一尺九寸在長
清縣靈岩寺

濟南府推任公詩

詩呈 堂頭雲禪師

瀛口上

放開塵眼頓超凡便覺棲真悟泐潭碧障排空千仞瀛清泉漱
頰十分甘五花殿裏師因果百法堂中間指南若道爲官太拘
束三年三得到精藍

皇統丁卯三月二十八日監寺比邱子方上石 宛人胡寧刊
右詩及標題凡十行字徑九分後年月二行正書徑五分
任瀛官濟南府推志乘皆失載

靈岩寺觀音聖跡碑

皇統七年七月立正書石高三尺一寸廣一尺三寸五分
在長清縣靈岩寺

右碑分二層上層刻觀音聖跡像下層刻序文二十七行
字徑三分

靈岩寺面壁像記

皇統七年十二月立正書碑高三尺三寸廣一尺六寸在長清縣靈岩寺

右碑分二層上層刻面壁像下層刻記文二十四行字徑五分碑末題靈岩住持法雲募工重立蓋取少林舊碑重摹非靈岩原有也記中稱知登封縣樓君異案宋史樓異傳不載其知登封縣三十六峯賦石刻爲異所作結銜與此合蓋史文之畧也

康洲靈岩寺詩刻

皇統八年五月刻正書石方廣一尺六寸在長清縣靈岩寺

贈靈巖西堂 堅公禪師 武安康洲

縈迴綠水遶春山蝶舞鶯啼白晝閑誰似西堂知解脫不教憂

色到朱顏

伏覩 甲兄都運觀察贈 西堂禪師佳什言超物外奇逸清高如閑淡煙雲縈巖映岫自生光彩耳謹命工刊諸琬琰用久其傳皇統戊辰歲五月初十日住持僧法雲立石

右詩刻七行字徑一寸跋四行字徑五分康淵此詩殊有風致中州集未之收也法雲跋云伏覩甲兄都運觀察又叙照禪師塔銘亦稱運使康公則淵嘗爲轉運使矣甲兄未審何義或以甲乙爲行次之稱耳

金堆寺碑

皇統九年四月立正書篆額碑高五尺八寸廣二尺五寸

在福山縣金堆寺

增修金堆院記

額三行字徑三寸

增修金堆院記

□□□□□之□百有餘里縣曰福山阜昌時所置舊爲鎮曰
兩水兩水源所從出東西相望湛遠因地就下並流於縣之東
北距縣數里土人目之曰東西河涉西河並涯而南十五里而
近得山曰金堆凡河濱之山類產鉛錫則其巔必童焉無復佳
木獨茲山松櫟翠茂蒼然爲諸峯最形勢雖不甚高而平瞰西
南諸山纒繞遠近疊見錯出環峙騰赴若皆出其下者秋水時
至澗壑奔會彌望數十里驚湍駛浪霆擊雷轉怒噴乎金堆之
趾氣衰力屈然後循麓而北去與所謂東河者合而入於海大
略如蜀江之奔峽必喧阗震薄乎灩澦之下也海山浮動天境
勝絕自五代顯德時有僧結廬於此古刻略載其事而失僧之
主名甲乙授受殆且百年蝸負蠖屈其跡不顯後有僧行容者

以十方之請主之稍治堂殿十餘楹自慶厯迄于今蓋又百年
矣穿蠹歛腐風雨不支其徒拱手熟視曾莫之或恤也天眷庚
申登之戒壇僧曰智隱始來居之隱謹於戒律毫髮不敢叛其
教以故山之父老頗信而歸之用能得其助易弊扶傾歲餘則
苟完乃鑿山腹大闢其舊址築堂曰華嚴以□□事赴者方□
□矣未幾而隱化其弟子曰義海實嗣承之克肖其師之勤而
加敏焉於是修廊巨厦重門複闕煥然相望輪奐一新若有鬼
神陰相其役道俗之人嘗去之暮月而復至者若不愕立駭視
意其爲化城佛土且疑夫璇題貝闕一旦涌出於海龍之宮也
而其聯清儲窳窳靖深幽花奇石左顧右觸扶疎蒼蒨大抵
如畫圖羅漢大士所居數年之間聲聞四遠凡宦游旅至於東
方者以不一到爲平日之恨又往往繪之屏素而去以歸詫其

鄉閭嗚呼是誠奇特未始有也余以皇統甲子到官公事之隙
時至其所因熟海之爲人持律嚴甚未嘗見其怠而又果於事
功意所欲爲持之以決而濟之以勇雖寒暑風雨胼胝暴露莫
顧也用是以能有成後數年余以疾請閒而遂寓於此凡海之
經營鳩勦至於一切大備實盡請其本末故海以記文見屬且
質於余曰吾營造之力勤矣有功於吾教者不爲少矣然吾竊
有所病焉夫 佛祖之法以空虛寂滅爲宗安樂戀著爲戒衲
衣乞食巖棲木槁坐進此道無所擇也後世末學乃始飾其虛
美其服甘其食範金聚土像設於其前鳴魚擊鼓講說於其後
齊民下士怵之以禍福罔以發其遷善遠罪之心權也顧獨無
大善知識議吾之後乎余曰是不然夫道一而已矣有本斯有
末有原斯有流磬筦不陳曷以知樂之和玉帛不將曷以知禮

之節言語文章不載諸簡編學校庠序不設於邦國曷以明聖人之教也吾儒固爾師亦何病雖然兩水之爲縣也垂二十年權輿之人因陋就簡迄今無所謂縣學者春秋釋奠寄之廨驛而已縣有癡僧舍毀之則重勞而可惜余欲因其故治之以爲夫子廟堂而稍增其齋廡然縣所不得專嘗以是三請于郡而不獲命則喟然歎曰先聖通祀于天下豈必待一福山之廟而尊師重道者顧豈少一汾晉野人也哉卒不遂所請而止今師不持一錢捐軀奮議主張教法於空山荆棘間乃克有就如此余之愧於師也厚矣夫復何云皇統九年四月且日前縣令臨汾張邦彥記

住持僧義海立石

尹宥刻

右碑文凡二十四行字徑九分前縣令臨汾張邦彥撰文極似柳州筆法其政績無攷然其爲令時以縣學未建三

請於郡而未成因於記中寓意寄慨卽此可見其概故樂爲載之

雲禪師塔銘

皇統九年五月立正書篆額石高五尺八寸廣三尺在長清縣靈岩寺

右碑額題寂照禪師塔銘三行字徑五寸文二十四行字徑八分正觀撰文□□書丹義詔篆額皆出比邱之手結構甚佳惜下截殘闕文稱轉運使康公尤爲知遇卽指康淵也

靈岩寺寶公開堂疏碑

皇統九年八月立并額俱正書碑高五尺三寸廣二尺九寸在長清縣靈岩寺

右碑額題開堂疏三字橫列徑四寸文及題銜凡十八行
字徑一寸三分徵事郎濟南府錄事夏綽書僧宗安立石
年月下有濟南府印方一寸八分疏後列銜五人內府判
官闕名濟南府尹完顏篤化叔同知濟南尹事韓爲股濟
南府少尹顏沒良虎濟南府推官權判官李德恭皆未載
府志

程康年等登高題字

天德二年九月刻在嘉祥縣洪山

右刻未見拓本據朱朗齋所錄載之首題籀文天寶庚午
登高會七字後題會首程康年等二十四人凡八行正書
伏羲廟碑

天德三年九月立并額俱正書碑高三尺七寸廣二尺在

鄒縣鳧山西麓伏羲廟

右碑書文皆俚鄙其額題伏羲二聖耶嬭六字碑文首書大金遼陽軍鄒縣鳧山天下槍劒武藝社記委巷人所爲類如是也金史地里志鄒縣有鳧山與記合碑後書天德三年九月立石文內空處又有正隆元年二年三年及大定七年十二年十四年十五年十七年等字此爲後來續題每行下往往有賽字蓋爲賽社而作也

靈岩山場界至圖刻

天德三年刻題字正書石高二尺廣二尺八寸在長清縣靈岩寺

右圖刻首題靈岩山場界至之圖八字橫列徑一寸一分圖下刻寺僧裕顯記文十四行字徑三分

農黃帝祠堂碑

貞元二年三月立正書碑高三尺九寸廣二尺二寸在滕縣城西雍傅村福勝院

右碑文及標題年月凡二十七行字徑六分前軍學經諭朱昂撰文并書文辭鄙陋無可稱述惟系銜軍學有經諭未見金史百官志蓋金立國初依宋制地有軍名至後盡升爲州於是官亦裁易而史文不備多矣

重摹唐襲邛令庾公德政碑

貞元三年五月刻并額俱篆書碑高七尺二寸廣三尺一寸在寧陽縣署

唐襲邛縣令庾公德政頌

額五行字徑二寸五分

大曆五年九月三日建

年月一行字徑三寸

荀藐古之良宰也榆次碣之庾公今之賢百里也龔耶頌之姑
無□□□□紀議者謂庾公之政尤矣公初告羣吏曰昔孝
宣憂元□□爲經國□□□□長廼擇郎官御史出宰縣邑
我自任城尉驟居五百石非才何□□之□□□蘇疲人祇若
明命廼密禮讓省刑罰紓力役闢土田宣□□□□儉□

□□作時雨咏爲春風於是齊魯丕變井閭咸復三載考績一方
歸最都□□□御史清河張公曰昌牧伯之賢也訓俗馭官
勸直沮枉述職之地類能□之□方諸爽氣日暮更清比之松
筠歲寒轉茂題以上下之目出乎羣萃之□□□千里異聲同
歡曰以伯達之良牧賞況孫之茂宰宜矣公名賁字文明其先
□川人成周之時卽爲掌庾因以命族公其胄焉公之考曰欽
嗣爲光州別駕□王父曰元汙爲尋陽令曾王父曰師則爲

蜀王文學楷模繼代龜麟接□□麻中邑老彭滔等三十五人
以公岐柔□大威願刻石褒美申于元戎元□允答縣人以
陽冰與公周旋備詳德行□之作頌多魏能文辭曰於穆康
公宰字之良化洽百里風播一方邑老上請願言頌德元戎嘉
之金石迺刻

右文十三行字徑一寸五分

佑之聞翼邛庾公德政碑舊矣自唐大歷五年歲在庚戌至今
貞元三年乙亥已三百八十五年善□□□芳塵孰嗣而李公
之文辭篆字世所貴者佑之到官之初首加詢訪乃於廳事之
後墾土中得其□□□壞散亡僅存其半嗟青瑤之沈埋懼磨
滅之無日思欲得完本重刻于石未易□也聞邑尉永□□珣
君瑞肯爲尋訪於邑人彭鼎家得舊藏舊紙本一以示佑之詳

讀玩味頗口頁見於是礱石命工口刻舊記庶乎庾公之德政
與夫李公之辭翰爲不朽云五月一日承務郎兗州龔縣令林
口宋佑之記 徵事郎主簿孫思 忠武校尉縣尉王景

俊

右記六行正書徑五分在碑文左幅上層

有唐庾公嘗宰是邑當時治績昭著而李公善口口口口正
人之目以頌其實口口既刻亦庶不朽口期記跋其口廿餘年
來 再立德政不絕如綫 縣令宋公下車之始口口口口迺
口口口勒口口口口宋公之爲治有慕於庾公之治邪不然
何以口口口口公口口以口口口而今者往口口人歟儒卿
謂庾宋之治時口口而口口口矣邑人鄉貢進士卜儒卿跋
管勾造碑口口耿口口

右跋六行正書徑六分在碑文左幅下層

此碑建於大歷五年至金貞元三年龔縣令宋佑之以舊本重摹於石佑之自爲記竝卜儒卿後跋刻於碑之左方碑文下截泐去三五字餘俱可辨其攷證已詳各家著錄黃小松司馬云碑陰尚有金貞元間給事郎守令于象及典史單文等名未見拓本

張汝爲靈岩寺題記

正隆元年五月刻正書石高一尺八寸廣二尺九寸在長清縣靈岩寺

右題余素好林泉之清勝久聞靈岩名山迺自昔祖師之道場也所憐塵緣袞袞未獲遊覽比雖守官汶上鄰封咫尺亦無一到茲因被檄賞勞徐宿邳州屯守軍兵還登岱

宗故不憚迂遠行役之勞惠然而來周覽上方勝概云云
後書正隆丙子歲仲夏初七日同知東平總尹遼陽張汝
爲仲宣題凡十八行字徑一寸二分末立石姓名二行字
徑五分案金史張浩傳子名汝爲浩籍遼陽渤海故汝爲
單舉其郡名也汝爲歷官史書不載惟中州集稱爲河北
東路轉運使未知其先曾官同知東平總尹矣武虛谷云
地理志東平府以府尹兼總管此結銜稱總尹者殆并二
官名爲一與

釋迦宗派圖刻

正隆元年八月立正書額八分書碑高三尺六寸廣一尺
八寸五分在長清縣靈岩寺

右碑額題釋迦宗派圖五字徑二寸五分橫列於上次總

敘宗派次宗派世系下層刻牟尼佛象右邊題云西京嵩
岳少室山少林禪寺洒掃比丘惠初宣和二年九月晦編
集左邊題云正隆元年八月旦日濟南府長清縣十方靈
岩禪寺住持傳法沙門法琛立石皆正書徑四分

趙幽仰天山詩刻

正隆四年五月立行書石高一尺七寸廣二尺四寸在臨
胸縣仰天山觀音洞

草木霜餘度老黃山川秋勁發新涼壺中樂趙身疑到物外塵
勞頓覺忘下瞰蒼莽盤地軸上看咫尺對天光可憐簿領催歸
騎回首西風日口央西樓趙幽題

住持傳法沙門缺正隆四年五月一日

右詩刻九行左讀字徑一寸五分後刻石年月二行正書

徑五分

東鎮廟修五殿記

正隆四年六月立并額俱正書碑高四尺二寸廣二尺一寸在臨朐縣沂山東鎮廟

右碑額題東鎮修五殿記三行字徑二寸四分文二十行字徑六分碑爲太學生沂水劉口撰案金制國子監國子學太學隸焉銜稱太學生者別於國子學也

王整等登高題字二種

年月書體詳後在嘉祥縣洪山頂

右刻未見拓本據朱朗齋所錄載之一題云正隆四年登高社口社人王整等名行書四行一題正隆五年登高社首陳成等名正書四行此種之前有宣和二年四字又一

石題承安二年七月十九日□□村石匠下皆漫滅亦增載之

任君謨表海亭詩殘刻

無年月正書碑高二尺八寸廣三尺在長清縣城三賢祠

表海亭詩 南

缺

營丘最高隅表

缺

兩城相對起□

缺

人家林壑間

缺

□上一增懷青

缺

南麓老人天下奇才也世人止以能書見稱謂當爲 本朝第

一然誠云確論而尚不知 先生所能者多矣又豈止筆札而

已哉

下闕

國以忠貞臨政以清白至於騎射驍勇音律琴瑟丹

青藝巧靡所不

下闕

翰墨皆所以大過人者非天下之奇才其

孰能與於此東坡嘗謂詩至於杜子美

下闕

可以畢天下之能

事不其偉歟噫坡公仙去久矣若使見先生全才如此其許可

豈

下闕

右殘刻存詩五行字徑四寸跋語五行字徑八分段赤亭

云是刻已缺下截乃任君謨表海亭之作也舊在西門外

菜圃中乾隆庚戌始移置三賢祠

元

案碑中存字是五言

古詩凡四韻後跋亦缺姓氏元遺山中州集載南麓詩不

收此篇南麓亦無專集可補深爲惋惜

穠芳亭石刻

無年月正書石高四尺四寸廣一尺九寸在鉅野縣治西

北

右刻題穠芳亭三字正書徑一尺一寸左刻石九梁跋三
行字徑四分縣志載宋時邑人當秋成報賽詣亭致祭僉
欲鐫石亭中因延王維翰書額未至有妓女謝天香者以
裙裾濡墨大書穠芳二字未竟而維翰至續書亭字如出
一手王謝遂爲夫婦偕老今案穠芳二字狀如飛帛多燥
鋒亭字則渾然雄健洵屬兩人書格特字體大小相稱耳
碑無年月朱朗齋以縣志載維翰舉大定間進士爲永霸
令遂列於金大定之前今從之

廣岩院勅牒碑

大定二年二月立書體詳後碑高四尺九寸廣二尺四寸
在城武縣北南魯村廣嚴院

右碑上層刻大定二年二月勅牒一道下層刻廣嚴院記

凡二十四行正書徑八分鄉貢進士朱阜亨撰文鄉貢進士充縣學齋長馬致遠書記後列銜有忠顯校尉武騎尉權成武縣機察官曹佐金史百官志有機察使機察副使至九鼎大湯津渡惟置機察官一員碑言機察官者是也然未著其地攷史記平準書宋太邱社亡而鼎沒於泗水彭城下單州與彭城相近故有九鼎津之名機察官殆設於此歟

彼岸院敕牒碑

大定二年十二月立字體詳後碑高四尺一寸廣二尺七寸五分在博山縣後峪英山下彼岸寺

有碑武虛谷官博山時曾親見之竝爲跋云彼岸院敕牒石刻今在寺內龕置前院之西牆孫文定公顏山雜記云

金世宗大定四年敕建有尚書禮部牒文刻石院中餘文不可辨讀者此也就文諦視額題重修彼岸院記篆書六字上層刻尚書禮部牒奉勅彼岸院下有押字另行正書大定二年十二月中鈐一方印後列銜四人中憲大夫行員外郎李宣威將軍郎中耶律皆氏而不名侍郎下無氏末行筆畫重疊結紐成文半已殘闕無從推諗惟一王字下有押金史百官志禮部尚書一員侍郎一員郎中一員員外郎一員此題四人與官制符其末書王字者當爲禮部尚書王競也文階正五品曰中憲大夫而員外郎從六品凡散官高於職事者帶行字此牒中憲大夫行員外郎可案也宣威將軍在武階正五品之中而帶于文職事官文武階金制通用如此下刻記文正書二十九行題守法

沙門沖口撰又題淄州段當是書石者惜名已缺記文略可屬句有村曰掩底寺曰彼岸大唐沼法師所建十大寺中之一於是知寺固肇於唐非金世宗創置矣村曰掩底今土人作掩的案的誤音爲滴轉上聲爲底金時稱寢殿小底諸名近僕人沿此自稱小的亦猶是也又有稱武畧將軍武功將軍者徵諸史志武階從六品下曰武畧將軍而不見有武功及檢大金國志亦不載於是又知此記足補金制所未備也

福勝院勅牒碑

大定三年正月立書體詳後碑高五尺二寸廣二尺三寸五分在滕縣城西雍傳村福勝院

右碑篆額未拓上層刻大定三年正月勅牒一道下層刻

福勝院記二十一行正書徑七分列銜五行字徑四分記
爲隴西李傑撰釋普深書并篆額後列奉信校尉滕陽軍
司獄權滕縣主簿飛騎尉楊驥儒林郎滕陽軍滕縣令武
騎尉賜緋魚袋李自牧百官志正七品上曰奉信校尉下
曰昭信校尉今案碑又有奉信校尉豈以奉與承義相近
因易奉作昭與抑奉信卽承信之初名與後又有從仕郎
前原州知法趙宣差山東兩路捉殺都統所差充滕陽軍
捉殺盜賊巡捕劉山東東西兩路兵馬都統府差委滕陽
軍捉殺盜賊兼機察事王三人名皆不可見案都統之制
見于兵志者收國元年及天輔五年竝稱司天會元年始
易稱府今此碑有都統府又有都統所當是府之次而未
收於志其捉殺盜賊巡捕及稱兼機察事悉由府與所充

委則其官微矣史不具錄殆以是與

龍泉院碑

大定四年九月立行書碑高五尺五寸廣三尺五寸在濰縣龍泉院

右碑文二十六行字徑一寸文爲沙門口口撰王湛書字體頗遒勁惟文辭庸俗不稱耳

普照寺敕牒碑

大定五年正月立碑高二尺廣三尺二寸在泰安縣普照寺

右碑據朱朗齋云文已漫漶不能悉辨勅牒銜名與後大靈寺碑相同惜住僧請勅告詞存字無幾爲莫攷耳

興國寺勅牒碑

大定五年五月立書體詳後碑高六尺二寸廣二尺六寸
在滕縣城西白蓼村興國寺

右碑上層刻勅牒一道下層刻興國寺記二十八行正書
經六分鄉貢進士奚牟撰并書篆額未拓

普安禪院勅牒碑

大定五年八月立碑高一尺六寸廣二尺六寸在淄川縣
西南二十里普安禪院

右碑未見拓本據朱朗齋云勅牒形式皆同普照寺及大
雲寺二刻

大雲寺華藏世界海圖碑

大定五年九月立書體詳後碑高六尺二寸廣二尺四寸
在泰安縣大雲寺

右碑額題依大華嚴經錄華藏世界海圖篆書十二字橫
列徑一寸五分上層佛象凡二十層刻鏤極工兩旁皆有
題字次海波蓮座及風輪六道亦有題字圖下刻宋元祐
八年沙門法圓序文三十八行下層施主姓名三十四行
俱正書字徑三分碑陰額題大雲禪寺勅黃碑記篆書八
字橫列字徑二寸首層刻大定四年閏十一月勅牒文凡
十五行字體不一次層刻公據文十二行正書大小不等
下層刻度僧名數正書徑五分第一代海定度僧二十一
名第二代慧宗度僧十四名案金史百官志凡設僧尼道
女冠三年一次限度八十人試之經卷皆以誦成句依音
釋中選者試官給據以名報有司其額限如此此碑爲刻
給據故并度僧名列之也

遇仙園石刻

無年月石高四尺六寸廣二尺在掖縣長生觀前

右刻題遇仙園三字草書徑一尺五寸陰題遇仙樓三字正書徑一尺五寸旁注長春子立四字正書徑四寸案長春子姓邱名處機棲霞人碑無年月朱朗齋據縣志所載劉長生遇王重陽事列於大定九年

王重陽畫象詩刻

無年月石高一尺八寸廣一尺四寸在掖縣青蘿館受宣堂

右畫象刻王重陽幅巾道袍曳杖而行上題五絕云三冬游海上六出滿天涯爲訪神仙窟經過道士家行書徑八分左刻壬寅仲夏月丙午日萊州丹陽觀立石正書一行

徑五分此與上一種皆未見拓本據朱朗齋所錄存之

文登縣新修縣學碑

大定十二年七月立正書碑高五尺三寸廣二尺八寸在

文登縣學

文登縣新修縣學記

文登在漢爲不夜縣後併其地爲牟平至高齊天統間析牟平置文登縣取境內文登山爲名考諸傳記縣東二里有山古老相傳秦始皇東巡召集文人登之因號爲文登山後遂爲縣名其地雖僻左觀其命名之意則知文風藹然其來尚矣自秦以還歷漢魏晉隋唐宋以迄于今士好經術俗尚禮讓斑斑有典刑在蓋由家有塾黨有庠遂有序之所致也粵自宋慶歷中敷天下郡縣建學俾歲貢士一由此出其後熙豐崇觀教養賓興

之法備廟學之興溢乎四海之外文登舊有學官在邑城東南隅大觀初復增大之規模宏敞爲諸邑冠迄宋末齊初雖文物掃地而殿宇巋然仍舊長倩爲兒童時尚記從先生長者遊於其間不旋踵盜起城陷學舍悉爲煨燼兵革旣息再至其地則爲國蔬過者永歎而已距今四十年春秋釋奠薦裸無所權於縣廳事□□□如齋宮望祭然閱累政莫克有作往往以書期會爲急於俎豆之事藐然不暇顧省大定九年秋聊城李君大成作邑於此□□□將喪至于

至聖文宣王而無祠宇莫謁迺喟然嘆曰學者眞負於

聖師也吾起於諸生當任是責敢復因循熟視而不爲乎越明年政成訟理威惠兩立□□□服一日語同僚及諸秀造曰釋老之徒各尊其師崇大其居道官佛刹相望於天下今以

萬室之邑文獻尚可徵而

吾夫子廟食無地吾徒服儒衣冠學聖人之道能無媿於淄黃
今于縣治之東得高明之地□□□其上諸君其相我衆皆稟
命而退公於是首出圭俸募工鳩役市□材於西山盡榱桷
梁棟之美又取南山之石琢以爲柱□□□歲不朽計邑中之
士爭相出力左右其事公每退食卽親督其役以之爲殿爲堂
爲齋爲門庭階序各以次舉棟宇穹隆屹起於海□□嶠之間
袞服煌煌廟貌一新配食從祀之賢像設繪事煥然爭麗經始
於庚寅歲秋落成於壬辰之三月華旂一揭萬目仰瞻皆□□
□之材能立事也於是學之耆舊及新進以書抵京師求文於
長倩將刻琬琰以紀厥功長倩抑嘗聞之學校不修詩有乎矜
之刺□□鄉校傳載子產之譏文翁爲蜀郡守以興學爲先務

仇覽爲蒲亭長亦今民子弟就學皆知教化之本原也今李君學古入官天資秀逸又以忠信豈第化行一方復能體

朝廷尚文之意立學以勸邑人孜孜而不倦怠願非俗吏之所能爲也使吾閭里秀傑之士相與升降乎其中仰視黼黻俛見籩豆觀禮識古講先生之遺文洋洋乎弦誦不絕因之以射策決科自致青雲之上則李君之於吾邑其功利可勝計哉故愚樂爲之書大定十二年七月初吉朝請大夫行太常丞騎都尉汾陽縣開國男食邑五百戶賜紫金魚袋邑人郭長倩記

縣丞高仲淵

進士郭榮祖書丹并篆額

縣丞高仲淵

主簿納懶阿都

縣尉張任立石

孫

仍刊

右碑篆額未拓文凡二十二行字徑九分文爲郭長倩撰

史稱長倩字曼卿文登人登皇統丙寅經義乙科仕至祕書少監兼禮部郎中修起居注而不載其行太常丞是史畧也

興國寺新修大殿碑

大定十二年十月立正書碑高六尺二寸廣二尺六寸在滕縣城西白蓼村興國寺

右碑上層刻記文二十八行字徑七分鄉貢進士滕陽軍學錄陸秉均撰并書金史地理志滕州上刺史本宋滕陽軍大定二十二年升爲滕州今碑立於大定十二年於時猶仍軍名惟軍設學錄不見百官志或軍旣升爲州其員遂并省改易而史失載歟下層刻舊大聖院存留公據二十六行字徑七分天眷元年八月二十五日付僧圓義收

執列銜文林郎特差充軍事推官權簽判孫文林郎權簽
書判官廳公事孔承務郎特差充同知軍事權軍事宋知
滕陽軍事亭董四人民而不名以志證之知滕陽軍事郎
州刺史也同知軍事郎同知也簽書判官廳公事郎判官
也軍事推官郎專掌通檢推排簿籍司軍也名雖易其職
可據如此

清涼院敕牒碑

大定十四年五月立正書篆額碑高五尺一寸廣二尺七
寸在平陰縣西門外清涼院

右碑額題敕賜清涼之院三行字徑三寸上層刻敕牒一
道下層刻發賣所公據一道及記文十九行字徑五分前
進士王去非撰里人張彥羣刻并篆額去非郎醇德先生

党懷英撰墓表稱其試有司不合卽屏去後又用年得官九品此碑署前進士蓋金制凡試有司者皆得謂之進士積年亦可得九品官也

竇公禪師塔銘

大定十四年七月立正書篆額碑高四尺廣三尺在長清縣靈岩寺

右碑額題竇公禪師塔銘六字橫列徑三寸六分文二十六行字徑八分下截爲土所掩撰文者爲相州林慮縣仙岩梅軒居士翟炳書丹者忠顯校尉眞定府醋同監閻崧案百官志稅醋使司視課多寡蓋依酒課不及二萬貫爲院務設都監同監各一員此稱醋同監卽是職也文稱太師尚書令南陽郡王張公浩與金史張浩傳語合康公淵爲

運使見贈堅公禪師詩韓爲股同知濟南尹事見靈岩開
堂疏此碑正敘皇統九年開堂事而稱其爲正尹者何也
後有濟南府尹與泰寧節度使及府判三人銜尚存名氏
皆不見

福勝院敕牒碑

大定十六年正月立書體詳後碑高三尺九寸廣二尺三
寸在青州府城西福勝院

右碑額題敕賜福勝之院正書六字橫列字徑三寸上層
刻大定四年敕牒一道下層刻大定十六年施主題名二
十七行行書徑五分碑陰刻大定九年施主題名二十一
行正書徑六分段赤亭云百官志禮部尚書三年遣官試
僧尼通經者以度之所試者名僧童尼童此碑有童行李

福聚者是也進義校尉碑結銜皆作進議誤

章邱縣重修宣聖廟碑

大定十六年八月立并陰俱正書篆額碑高六尺五寸廣

三尺在章邱縣學

重修宣聖廟記

額三行字徑三寸五分

重修宣聖廟記

濟南進士李坦之書丹

進士崔洋篆

額

學校之設先王所以明教化厚風俗作成士類也成周之時家有塾黨有庠遂有序國有學其教養賓興之法無一不具故采芑詠于新田菁莪歌于中沚肆成人有德小子有造號稱譽髦者藹如也去古寢遠上無明天子下無賢方伯先王之制幾於掃地春秋二百四十二年之間諸侯之築宮室營宗廟爲臺榭

作門廡者載在國史莫不備書之至於學校之制獨無紀焉漢唐以來而稍稍復古畱意於茲至永平開元之際亦不謂之不隆然當時非特上之人有以倡導而亦循良之吏如文翁常袞者爲之勸率焉

國家承平日久兵革不試年穀屢登正右文之秋也有官君子不於此時主張吾道增飾儒宮是使文翁常袞之徒專美於前也陽邱齊之巨邑舊有學在城西南隅歲月滋久加以兵火之餘廊廡門庭蕭然一空殿堂僅存頽簷敗壁不堪其憂前後令丞不知其幾人視此而恬不知恤大定歲次癸巳秋八月從仕尹公革致君以進士登乙科來貳此邑首謁殿下四顧荒涼不勝慨歎然視事之初未遑修也泊三年有成政適多暇一日謀諸士大夫曰嗟乎佛老異學吾徒鳴鼓而攻之者也今琳宮梵

宇遍滿郡邑朱薨碧瓦燭然相照吾夫子有功萬世吾徒之奉
師反不如異學之拳拳也斯亦罪人矣迺出已俸帥先邑人相
與鳩工度材曾不踰時而告成棟宇門牆衣冠繪像燦然一新
邦人愉愉若覩闕里俾春秋之祀不適於野豆籩之禮有列於
庭將見蘭臺之英金閭之彥疊疊然由此而出不其翬與噫郡
邑之官所使承流而宣化者也豈徒弊精神役思慮於簿書獄
訟而已哉有能講先王之制尊吾夫子之道使教化之宮廢而
復興禮義之地荒而復闢可不謂之賢乎且公勇於義果於政
至其章章治迹著民耳目者則有與人之誦此不復紀予與公
爲鄉人又同筆硯間見聞其事爲詳故於此亦喜書而樂道之
雖不吾請猶握管以俟況有請之勤者耶大定十六年八月初
一日徵事郎前滑州軍事判官姜國器記

管勾修造進士趙洵仁仲龔同管勾進士劉磐李復古尹天民
班祇進義王昌符、進士胡作均李枏趙佐聖耿憲王夢孜
公秉鈞劉德昭李天錫陳善信明泰李祺曹昌國張嗣祖鄒觀
仲嗣趙之才趙瑀姜昭張百祥鄉老王平王暉同立石 田繼
先刊

碑陰

碑陰記

重修宣聖廟碑陰記

廟學基址僅存歲久不葺地勢侵削日就狹隘殿堂雖在不足
以庇風雨予適承乏爲邑丞且慮棄去不修則寢至累壞迺出
已俸以帥先士大夫及邦人之好事者量力相時以助其費至
於不給則繼以私財易其弊陋加丹雘而一新之更飾廟貌皆

設漆帳復爲前簷□□東序西序各五間皆樹以叉木繪畫速
肖諸賢與左邱明以下從祀□像儀門三間以粉垣易之畫戟
度數禮無違者前門一間東西築雉垣以限內外周圍固之以
大墉其地則殿與臺門相去五十二尺強半東西序相去四十
一尺二門相去一十尺門至南牆闕爲街一十八尺南濶一百
二十五尺北濶一百一十二尺南北長二百三十五尺蓋侵削
之外見存者耳殿後舊有堂今則易其名爲明教其坊則榜之
曰崇聖又爲祭器二百餘事春秋奠饗粗亦充用命工經始在
七月初吉洎八月上丁禮畢張樂爲具以落成之是日居人
駢集黃童白叟爭先覩之爲快始知有禮義之風已而鄉老王
暉者施以豐碑於是邦人共請旣爲口以刻之予以謂後之來者
寧知無子產之徒不惟不毀必有以潤色之也故鳩集其同力

者紀之碑陰云從事郎行縣丞尹莘記

以下助錢姓名不具錄

大定十六年秋八月癸酉朔五日丁丑疏首進士趙佐聖等同立石

木匠作頭李泉高政澤匠作頭楊定陳興

督役

韓直夏靖劉信孟口 掌計王宇 管廬王庶

右碑刻前滑州軍事判官姜國器記文十九行字徑八分末管勾等姓名二行字徑四分碑陰刻縣丞尹莘記及助資姓名凡二十六行字徑八分

釋惠才靈岩寺詩刻

大定十八年六月立行書石方廣二尺在長清縣靈岩寺方山野人因樂道自興作山居吟示 諸禪者當山監寺首座焚香禮求上石余不能伏筆 靈巖方丈惠才書

山僧樂道無拘束破衣壞納臨溪谷或歌或詠任情足僻愛林

泉竹靡鹿水泠泠兮寒漱玉風清清兮動疎竹閑身悅唱無生
曲石鼎微烟香馥郁幽居免被繁華逐贏得蕭條興林麓大道
無涯光溢目大用無私鬼神伏知音與我同相續免落塵寰受
榮辱浮生夢覺黃糧熟何得驅驅重名祿

大定十八年六月旦日當山監寺僧祖童首座僧宗元立石

右詩刻凡十二行惠才書體全學山谷老人詩格亦朴勁
中州集未採

眞相院重摹蘇子瞻施金帖石刻

大定十八年七月刻行書石高一尺三寸五分廣三尺二
寸在長清縣眞相院

右刻蘇帖十行字徑五分後有大定十八年劉資跋及寺
僧題名二十三行正書大小不等

阿魯歡等雲門山題名

大定十八年七月刻正書崖高一尺八寸廣二尺三寸五分在益都縣雲門山陽洞南

右題秋七月初六日同遊茲山登覽既久遂刻姓名于石
李朮魯阿魯歡下注懷遠大將軍山東東西兩路統軍都
監同知益都尹兼兵馬都總管事永安張子衍下注中順
大夫前山東□□□□副使渾源雷志下注奉政大夫山
東□□□副使諸甲春下注明威將軍山東東路都總管
判官完顏漸下注廣威將軍世襲千戶□□□□下注□
武校尉□□縣□大定十八年雷志題凡九行字徑一寸
五分小注字徑一寸題名六人末一人姓名不可辨每人
大書里居姓名其銜以小字分注于下此亦題名中秘見

也阿魯歡意卽金史學士魯阿魯罕由吏部侍郎除山東
統軍都監且益都府置山東東西路統軍司始於大定八
年本傳不言其判府事者畧之也中州集學易先生雷思
渾源人弟志字尚仲亦第進士仕至永定軍節度使卽此
雷志也

存畱寺碑

大定二十年七月立書體詳後碑高四尺廣二尺三寸在
鄒縣東北董家寨白泉寺

右碑額題篆書勅賜存畱寺碑三行字徑四寸中刻公據
文正書徑三分屋基年月行書徑七分末結銜正字徑二
寸此據朱朗齋所錄載之皆未及行數碑載大定二十年
聖旨令寺觀無名額及無神佛像者悉令除去聽易與俗

人居住其有神佛像者不忍併毀特許存畱此華嚴堂因有泗州大聖及十六羅漢像准與存畱給據收執額所謂勅賜存畱者以此世宗毀寺觀史無明文惟本紀載大定十九年三月上謂宰臣曰人多奉釋老意欲繳福朕蚤年亦頗惑之旋悟其非云云想嗣是卽命刑部行下州縣點檢分別去畱而史不載也僧道事應隸禮部而此云刑部者因聖旨內有所造罪犯亦與免放云云應歸刑部蓋其時新制創造寺觀盡合斷罪也

博州重修廟學碑

大定二十一年六月立行書篆額碑高七尺七寸廣三尺二寸在東昌府學

新修廟學之記

額二行字徑四寸

博州重修廟學記

夫有國家者欲成長久之業建不拔之基莫大乎厚風俗厚風俗之道莫大乎興學校蓋學校者教化所由出也孟子曰夏曰校殷曰序周曰庠皆所以明人倫也此之謂矣昔孔子欲行是道而不得其時乃修六經以詒後人孔子既沒之後雖復楊墨于戰國火于秦佛老于晉宋齊梁然其道揭日月卒使天下尊之以爲

先聖自京師至郡縣咸立廟學春秋釋奠與社稷通祀之至今不能易者何耶蓋自暴秦之後二千有餘歲其間願治之君有能尊夫子而行其道者効著于當年澤流于後裔故也略以近古治化最隆者明之漢唐之興莫不敦尚經術開設學校爲先務而繼體承流者復能守而不失間得人如文翁常衮由是漢

唐之風忠信廉恥庶幾三代及其季也先吏治而後德教政令
因而失敘水旱緣以爲災是時雖有外陵內侮之虞而國祚猶
能綿綿不絕至于三四百年之久者豈非人被先王之澤情止
乎禮義之効與卽是以觀則崇學校以宣教化有國者不可緩
也

本朝興太學于京師設祭酒司業博士之員以作新人材又興
天下府學州縣許以公府臬修治

文宣王廟舊有贍學田產經兵火沒縣官者亦復給于學此
國家崇儒重道之意也州縣能體是意而奉行之不無其

人而能如王公所居必興學見諸生以爲政先出于中心
之誠者幾何人哉公由

太子司經來倅博州兼提舉廟學事既下車謁宣聖廟是

時惟大成殿始新而未完餘屋皆敝塑像置平地土中 公

因諸公侍坐而問其故有對者曰始徐大夫興崇廟學置贍學之資逮兵火廟學爲灰燼天眷間趙大夫爲學官以此地創建幾于苟完今弊若此適太守完顏國公欲修崇之旣口新大成殿俄去郡厥功是用弗集公聞而歎曰今不嗣續其功殆非體上意而昭吾道也於是確乎以興作爲己任必欲凡所謂廟學者無一不具焉乃請於州賴 太守金吾劉公賢明樂善欣

從其請於是正其地而垣之廣袤伍畝有奇鳩材募工自大成殿始塗墍潤色役不踰時而制作粲然 宣聖之貌則取乎

闕里之像顏孟之容則法乎祕閣之本皆作藻井華蓋以尊嚴之升堂之像自袞而下繪壁之像自驚而下皆循其禮制而飾之其贊則有唐名臣之文講堂雖仍舊增櫺以廣其制使寬而

有容儀門復改作增土以高其基使翼然其正從祀畫像之廡
經籍祭器之庫肄業之館庖厨之室高下相對凡四十楹皆創
建而一新之壯麗宏敞合禮應圖以至墀序之布列垣墉之環
繞水竇之濬治花木之栽植一一如式計其費無慮五百萬皆
贍學之贏也原

空三字

公之意以爲苟不如是徒有修學之名耳

自非知教化之原惟在於學者其誰能之昔漢之文翁爲蜀郡
守乃選明敏有材者親自節厲每行縣益從學官諸生明經節
行者與俱吏民榮之由是大化蜀地學比齊魯于時人材有至
郡守刺史者唐之常袞由宰相出福建觀察使治臨於粵至爲
設鄉校民有能誦書作文辭者與爲客主鈞禮觀游燕饗與焉
俗一變歲貢士與內州等于時歐陽詹獨秀出學旣成舉進士
登第與韓退之輩同中選謂之龍虎榜今王公東漢彥方

之苗裔家聲赫奕文采風流則與文翁常袞不相上下若乃勸學則加于二人一等矣若二人止能待士以禮 王公又能

課諸生以文獎其勤以勵其游尚其能而勉其未至其肯承口講指畫爲文者皆有法度可觀推此則過於二人爲不佞博關號爲上州從來服儒冠道先王語登科者舉不乏人今又化

王公之德將見豪傑之士應時所選比肩繼踵而出豈如蜀粵止稱文常所得人材而已哉去非老矣無能爲也郡庠諸君屬之作記去非旣嘉 王公之興學又感諸君之知待不敢以鄙拙辭去非曰自徐公之守是邦當宋元豐戊午距

聖朝大定辛丑蓋百有餘年矣歷官者不爲不多能推至誠興崇廟學者不可一一數是知漢唐之治數百年史稱文翁常袞興學校移風俗其美爲二人所專爲不妄噫 王公方宣

天子崇儒重道之德意學者方嚮

王公之化風俗將益厚

矣博人何其幸哉公名遊古字元仲好學守道天下目爲邈東夫子其爲政也緣飾以儒雅故所口稱治云石碣王去非記

庭筠書

東平党懷英篆額

學正縉紳

信武將軍口口

州口候騎都尉高陽縣開國男食邑三百戶耿得中

金吾

衛上將軍充博州防禦使上護軍彭城郡開國侯食邑一千戶

食實封壹伯戶劉義立石

碑陰

廟學碑陰之記

廟學碑陰記

博州廟學厥惟舊哉宋元豐間徐公爽以已俸置廟學房廊施於學以贍學者厥後值宋季兵火廟學被焚學之故基因撥樓

間保泰爲縣署所占今聊城縣廨是也聖朝天眷間學正邢彪始謀指射舊都監廨基以議興建學錄尚耿輔之適趙公愨來爲教授公與正錄戮力規畫以贍學之資郡人之施建版堂三間兩廡十六間儀門三間門樓一間又塑宣聖顏孟三像旣成邸中甄公格宅有舊十哲像施於學又繪七十二賢像於兩廡亦可謂之苟完矣後十餘年防判趙紹祖與學正成奉世創葺講堂三間至大定甲午歲防判馮子翼爲釋奠行禮之隘以作新大殿請於州方委正錄晉紳路應辰以贍學錢市材木築基址會太守完顏國公允節來守是邦知書生當此重任力不能勝乃假以力功未及成移守於清此數君子有權與庠序者有分祿養資者有富貴而好禮者宜專其美爲不朽之傳而廣道諸儒歸功於僕蓋欲使後來者用心益勤將有大於是者遵古

惟墮成是懼故孜孜然卒其事安敢有其功哉若夫教化流行風俗移易人識廉隅國興仁讓然後語其成功不負數君子之志僕亦以此仰望於後來者焉熊岳王遵古記大定辛丑季夏晦男庭筠書門人李穀篆額 齊西王世永摸刊

右碑文凡二十九行字徑一寸末題名二行正書徑七分錢辛楣少詹云此碑東昌人謂之三絕碑三絕者王去非文王庭筠書党懷英篆額也三人金史俱有傳庭筠之父遵古時爲博州倅以興學自任庭筠此書結束殊有力真可與米顓蕪湖縣學記抗衡而去非作記時年已八十有一耄而能文亦可稱也遵古字元仲好學守道當時稱遼東夫子官至翰林直學士而庭筠傳中祇一見其名未免失之畧矣碑陰記文十四行字徑一寸八分記爲王遵古

撰庭筠書

清涼洞記

大定二十一年七月立書體詳後碑高二尺五寸廣八尺六寸在鉅野縣秦梁橋清涼洞

右記文六十六行正書徑七分後刻韓跋十三行行書徑八分梁跋四行正書徑一寸撰記者爲宋人鄧御夫自號海山子記作於崇寧元年未經刻石至大定二十一年始有村落好義之士捐錢三十千刻石於洞首山石韓希甫爲跋記之

重修東嶽廟碑

大定二十二年四月立正書篆額碑高一丈四尺一寸廣五尺三寸在泰安府岱廟

大金重修東嶽廟之碑

額三行字徑六寸五分

大金重修東嶽廟碑

翰林侍講學士少中大夫知制誥

兼左諫議大夫禮部侍郎護軍宏農郡開國侯食邑一千戶食

實封壹伯戶賜紫金魚袋臣楊伯仁奉

敕撰

中憲大

夫充翰林待

制同知

制誥上騎都尉江夏縣開國子食邑

五百戶賜紫金魚袋臣黃久約奉

敕書

承務郎應奉

翰林文字同知

制誥兼充

國史院編修官武騎尉賜緋魚

袋臣党懷英奉

敕篆額

臣聞嗜欲將至有開必先天降時雨山川出雲明神之所以昭
聖德也墮山喬嶽允猶翁河敷天之下哀時之對聖人之所已
昭神功也豈非幽顯之感通報施之明驗歟昔我

始祖景元皇帝肇基王迹遂荒大東迄我

太祖仁兵一舉爰革遼命及我

太宗繼伐徂口奄定華夏我

主上亦繇東都口纂大統紹開中興皆符帝出乎震之義也迺

謚 岱宗之神秉震秉鑒寔司東方東方者萬物之始故爲

羣嶽之長我 國家受命之攸在雖德自 口啟亦惟

神之陰相哉

口聖在位之十有口年內外晏清禮樂修舉口 帝于郊而

百神受職民穌物豐靡有苗害凡嶽鎮海濱名山大川率

命有司崇飾其廟貌嚴寅其祀事歲口親署祝版遣驛 命

守臣侍祠皆首於 岱宗大定十八年歲在戊戌春 嶽

廟災雖門牆儼若而堂室蕩然

口口聞之震悼不已俾治有司不戒之臯旣而歎曰神其或者

以宮廟故弊欲作新者乎迺

敕庀工度材以聞明年旨同

知河北西路轉運使事徐偉就遷□泰□□領其事彰德軍節度判官王元忠佐之皆選能也

命馳驅旨圖來上入受

訓誡示之期約且擇尚方良工偕往營之出內帑錢旨貫計者□有□□黃金旨兩計者二百四十有六及民之願出資助者幾十萬千且運南都之材旨足之復

詔其工役勿

煩吾民給旨傭直故皆悅而忘勞矣二十一年辛丑冬告成凡殿寢門闥亭觀廊廡齋庫雖仍舊制加壯麗焉

詔謂格

神之道所貴致潔其當陽之像毋用漆塑以涿郡白玉石爲之殿楹高敞勿事□障殿闕□□設爲儲胥俾四方士民遠致奠獻者皆遂其瞻禱之心而無褻黷之怠廟之西南隅舊設舍館賓客往來皆止焉郡吏時率倡樂旨娛之因爲□□□□□□

□□□□洞啟或終夜謹誨

詔以神靈靜謐之宅豈可使

之汙嫚如此卽其地更置廟庫俾門禁加嚴蓋所以崇肅敬也

自三觀而下十里□于□□□□□□□□二年四月 制詔

翰林侍講學士楊伯仁記其事臣伯仁承乏禁林職在贊揚

聖德豈敢以鄙陋辭謹書 詔旨之始末與其經費之多

寡□□拜手稽首而作頌曰

東方曰仁 萬寶資始 神惟空三岱宗 爰主張是 雞鳴

見日 其高巖巖 兗州之鎮 魯邦所瞻 觸石生雲 合

于膚寸 □□□朝 天下膏潤 無懷而下 七十二君

咸登空三茲山空三告厥成勳 於皇空三時金空三肇迹東

土 誕膺空三□□ 實乎空三神祐空三我后中興 出震

應辰 禋祀空三上帝空三懷柔百神 無文成秩 矧此空三

字喬嶽字三口口制度天子禮樂災之所生然在不虞

舊或未捨新何以圖洪惟字三聖明字三監此字三神

意字三親授規摹選能興事宸衷簡在民願攸同不

行于素案圖奏功臺門將將如鳥斯革廣殿巍巍

增佳日綴牲酒圭幣薦羞日時敢獻善祝神之聽之

聖人之德聖人之壽泰山之高泰山之久聖人之

業聖人之基泰山之固泰山之維神居孔安口饗

是格生甫及申蕃宣方國禮無不荅神罔時恫於

萬斯年福祿來崇

右碑文二十八行字徑一寸八分楊伯仁奉勅撰文黃久

約書党懷英篆額案金史列傳楊伯仁字安道棗城人仕

世宗朝由濱州刺史入爲左諫議大夫遷侍講兼禮部侍

郎久在翰林文詞典麗世宗嘗稱賞之黃久約字彌大東平須城人擢進士第歷官至禮部員外郎兼翰林修撰升待制党懷英字世傑馮翊人由汝陰縣尹除國史院編修官應奉翰林文字工篆籀當時稱爲第一史於久約之善書獨闕而不書觀此碑結體展拓筆格秀整真不愧爲大手筆三人之能萃於一碑當與博州廟學記並論也立碑年月已缺文稱大定十八年獄廟災明年興建二十一年告成二年四月楊伯仁記其事今拓本二年前上泐去七字當是大定二十二年碑卽立於是年也

馬丹陽普救歌碑

大定二十三年三月立并額俱正書碑高五尺三寸廣二尺七寸在福山縣積金山通仙宮

右碑分二層上層額題登州福山縣□□□□師馬
先生藏頭折字普救歌凡十一行字徑一寸五分歌十二
行字徑一寸三分後銜名五行字徑五分下層額題登州
福山縣黃籙大醮記五行字徑一寸五分又二十六行字
徑八分乃記馬丹陽主行醮事其歌亦爲醮事而作也

泰安縣重修宣聖廟記

大定二十三年四月立正書篆額碑高七尺二寸廣二尺
六寸在泰安縣學

大定重修宣聖廟記

額四行字徑四寸

大定重修宣聖廟記

泰安之爲州也有嶽祠以壯觀其中有岱宗徂徠泮汶漕濟以
環抱其外寔周公之封境

孔子之鄉國帝王封禪之所也亡宋開寶五年徙乾封縣于此
大中祥符元年改曰奉符廢齊阜昌之初改爲軍曰泰安

本朝開國六十有八年升之爲州自其爲縣以孫明復石守
道二先生山齋之故基建學以柏林之地課養士作成之材故
常有焉魁乎天下者則耿公昌世顯於翰林者則楊公用道是
其尤傑出者也惜乎歲久殿宇壞甚震風凌雨聖賢像弗
克僅庇爨舍顛漏學者鮮肯居之有司者吝出竟不之葺亦莫
如之何矣歲在戊戌嶽祠被焚

朝廷命徐公中憲

偉

來守茲郡尋蒙

宣召指畫嶽廟營繕之制公受

訓誠以還朝夕從事再葺告成

上遣使來視使者見其廟貌閎麗密壯甚稱賞之因詢以嶽祠

之弊公適口陳數事又言有一於此爲害尤重昔者嶽祠告修所壞運司必先視之兗州然後行之故曠日持久而不能有成也且如宣聖廟日就傾圯止請繕於運司尚三年而不報

況夫嶽廟更當稟于兗州乎稽滯之弊從可知已使者還

奏得可其請更其舊弊所謂宣聖廟雖以嶽廟餘材修之

公遂以規繩授之匠者大其廟度柱以石瓦以琉璃長廊四迴如拱如揖聖賢之像皆倣闕里而又講有堂處有齋以至庖湑亦皆有所委曲以盡心期副

國家崇儒重道之意人特見其誠莫知其所以施設之方可謂賢且能矣

朝廷可謂能擇人而任使之矣經始於壬寅三月十有四日落成於八月初四日俾守純爲文以記之守純以職在主善不敢

以淺陋辭故敘其實而復有說焉夫事之廢興殆非人力之所能也天也是學之壞久矣諸生所望者扶顛補漏而已猶爾齟齬願莫之遂今日一新甲于他郡始知天意以

聖上

守成

尚文之際不欲有司草創而修故使先難

其事也然則事之廢興豈非天平處乎其中被

國家教育之恩者當如何哉固不可泥於章句而止也當以致君澤民爲心知其所以學者而務進焉所以學者何哉曰道也道之在人則爲性性之妙用則爲神散之口應物則爲五常如或好仁好義好禮好智好信而未造乎道則其應物也雖勞心役慮求合於五常而處之然亦不能無蔽孔子於是有六言六蔽之戒也若乃造道之深則居之安居之安則資之深資之深則取之左右逢其原故其應物也不待勞心役慮求合於

五常而自然合矣

孔子於是有一以貫之之語也由此言

之學者之所當以道爲事也

子又曰朝聞道夕死可矣豈

非欲夫學者之以道爲事耶猶恐乎未之能入復示其所以入

之之門曰知幾其神乎君子上交不諂下交不瀆其知幾乎當

是之時顏子不幸曾子獨得其傳曾子傳之子思子思傳之孟

子其子思之論道則曰天命之謂性率性之謂道修道之謂教

又曰至誠之道可以前知至誠如神孟子之論道則曰存其心

養其性所以事天也又曰大而化之之謂聖聖而不可知之之

謂神夫二子之立言無少詭於

孔子者蘭陵荀卿反獨非

之謂口口口口不知其統嗚呼荀卿胡爲而云爾也是與二子

同門而異戶歟是其學之淺不足以知其深歟徐以其所著之

書考之蓋其學之淺不足以知深也何則荀卿有曰學者始乎

爲士終乎爲聖人觀乎其意則是以聖爲道之極也豈知子思
孟子以神爲道之極而得 孔子之所傳者歟宜乎妄生詆
訾而不顧也守純以謂儒家者流必欲助吾

君明教化不先造 孔子之道則難矣必欲造 孔子之

道不先踐子思孟子之言亦難矣而荀卿之說反使天下後世
有惑于二子失其所趨嚮故爲辯之俾學者知其所以學焉他
日或爲

朝廷之用庶幾乎不迷於政矣癸卯四月二十有六日李守純

謹記 進士劉禮書丹并篆額 州學齋長薛實 學

錄李頌之 學正安然 升卿 登仕郎泰安州司寇

判官提學甄之綱立石

右碑文及題銜凡三十行字徑七分李守純記進士劉

書丹并篆額文云宋開寶五年徙乾封縣大中祥符九年
改曰奉符廢齊阜昌之初改爲軍曰泰安本朝開國六十
有八年升之爲州金史地里志泰安州本泰安軍大定二
十二年升案金自收國建元數至六十有八年爲大定壬
寅是卽二十二年也碑與志文合阜昌初改爲軍志言本
泰安軍于他州背本宋某軍者有異以廢齊之置削之不
書也碑末結銜登仕郎泰安州司候判官提學甄之綱百
官志諸防刺州司候司司候一員司判一員判官當卽司
判異名提學蓋是提舉學校省文癸卯四月立石爲大定
二十三年不舉年號以前文開國六十有八年推之可知
所謂文例貴簡也

靈岩寺滌公開堂疏碑

大定二十三年九月立正書篆額碑高六尺三寸廣二尺八寸在長清縣靈岩寺

右碑額題開堂疏三字橫列徑四寸文及年月銜名凡十三行字徑一寸五分武虛谷云右疏前列左平章政事今請滌公長老住持濟南府十方靈岩禪寺爲國焚修開堂演法祝延聖壽者次列疏文末題大定二十三年九月空日不書中鈐平章政事印最後題金紫光祿大夫平章政事宗國公蒲察通名案金史世宗紀大定二十一年三月尚書左丞蒲察通爲平章政事二十三年十一月丙寅平章政事蒲察通罷據此疏左平章政事卽左丞也通居此官爲宰相之貳故當時亦云左平章政事矣始請滌公在二十三年三月之前及疏文立石實爲二十三年故前云

左平章政事後書平章政事官序可案如此通本傳大定十七年拜尚書右丞轉左丞閱三歲進平章政事封任國公百官志封號小國三十內有萊云舊爲宗以避諱改據是則通封宗國其後當避睿宗諱易號任國史本此書之耳

故奉國上將軍郭建神道碑

大定二十三年立正書篆額碑高七尺廣五尺二寸在青州府城東黃家樓西田間

大金故奉國上將軍郭公神道碑銘

額七行字徑三寸二分

大金故奉國上將軍臨潢路兵馬都總管判□□□郡開國侯食邑一千戶食實封壹伯戶致仕郭公神道碑

奉直大夫山東東路轉運都勾判官驍騎□□□任詢撰并書

承務郎應奉翰林文字同知 制誥兼 □□□修官武騎尉
賜緋魚袋懷英篆

公諱建義州宏政人幼而穎毅長而剛明□□□不爲人制
天會二年 王師南伐徵鄉邑良家子公預選首爲千戶以主
之□□□□□與遼常勝軍戰勝於白溝士氣振奮合併大軍
下燕雲越濁河定南汴四季□□□□東路諸將攻鉅鹿公
率衆先登潰其固壘公由是氣壓諸將六年收開濮七□□□
□□刺過江涉淮收壽春濠和州八季下眞楊通泰帥府先後
功賞以議官爵□□□□□大夫持節宥州諸軍事十三年
畱公屯守淮陽會韓世忠兵攻城東南隅□□□□□軍引
退天眷間公與宋人戰所向無前累獲勝捷賞亦懋焉皇統二
年換□□□□□□奉國上將軍 國家以仁義之師奉辭伐

□□□先公卒伯仁修武韓城鎮監□震纔貢進士亦先公
卒伯義伯信並舉□□□□適南公雲次適顯武齊琬次
適詢之子中道孫男九人女六人曾孫男三人□□□公
體貌魁偉美鬚髯猿臂雷歟天姿挺特內蘊忠鯁居正不撓平
時不飲酒□□□□當高燕出帷房之寵樂舞畢陳以永終
日或繼之以夜間語人曰予少年尚□□□□從軍賴社
稷之福戰必勝攻必取祿仕及親而逮下今既老矣得請而歸
以□□□樂胡爲大定十八年閏六月二十八日以疾終于
家享年八十有二以廿年冬□□□□擇地葬于益都縣青
丘鄉之潘村以余預姻親之故來請碑銘以傳不朽銘曰□□
□集覆有諸有桓桓我師震疊羣醜須得英雄成濟其美賢哉
邦君起家茲始白□□□心奮振既合我師燕雪底定越河

取汴風卷東雲鉅鹿推守勢溢吾軍渡江□□□真楊戰勝
攻取夫誰敢當師不宿老民厭兵久第績酬功俾安其守四宰
二同□□□優政寬仁懷良殄惡遂請歸來白首安佚賓朋
燕樂聊以永日榮身官邑及親逮□□□之福有足嘉者青邱
之陽安若故鄉子孫保之允矣不忘
大定廿三年冬□□

□□日伯仁立石

右碑兩面刻文共三十二行字徑二寸任詢撰文并書党
懷英篆額段赤亭云郭建不見於史太宗本紀天會四年
八月詔有司揀閱善射勇健之士以備宋十二月宗望諸
軍定燕山所檢閱之士卽碑內二年所徵鄉邑良家子可
知矣其餘征職之士多與史合又宋史韓世宗傳世忠屯
淮陽會山東兵拒敵粘罕聞世忠扼淮陽乃分兵萬人趨

揚州自以大軍迎世忠戰世忠不戰夜引歸碑云十三年
留公守淮陽以抗世忠必此時事也臨潢府地名西樓卽
遼之上京金屬北京任詢見表海亭詩殘刻賴此碑知其
子名中道郭公次女適之也

三清殿碑

大定二十四年三月立正書篆額碑高八尺廣三尺在嘉
祥縣城內萌山頂眞武廟

右碑額題三清殿記二行字徑五寸文及年月題銜凡二
十九行翟三僞撰文翟師軻書丹杜似篆額此碑未見拓
本據朱朗齋所錄存之

淳熙寺千佛殿記

大定二十四年立正書碑高一丈四尺廣三尺一寸在平

原縣淳熙寺

右碑文及題銜凡二十三行字徑一寸一分篆額未拓鬲
津進士王鼎撰文宦門仇定篆額縣志載淳熙寺在城西
郭從前廢置不一金大定二十四年僧智深重建大殿碑
在殿左卽謂此碑也

興教院敕牒碑

大定二十四年立書體詳後碑高五尺四寸廣二尺三寸
在淄川縣北郭興教院

右碑額題篆書淄州興教院記三行字徑二寸五分上層
刻大定四年勅牒一道下層刻記文二十行正書徑九分
重修伏犧廟碑

大定二十五年三月立正書碑高六尺廣二尺六寸在滕

縣梁山伏犧廟

右碑篆額未拓文及年月銜名凡二十三行字徑八分鄉貢進士趙大鈞撰文鄉貢進士孟居簡書并篆額後有劉甫王祚二人銜名與勅賜福勝院牒碑同碑又稱繪像丹青煥然一新御馬侍從莫不畢具觀此知神廟之塑儀從由來舊矣

王去非墓表

大定二十五年十一月立八分書碑高六尺六寸廣三尺七寸在平陰縣石峽村

大金故醇德王先生墓表

承直郎應奉翰林文字同知制誥兼國史院編修官雲騎尉賜緋魚袋党懷英撰并書

先生諱去非字廣道上世東蒙人系出琅邪諸王其居平陰之石硤者莫知所以徙曾祖友祖臻考通皆有隱德先生束髮知問學爲文章不喜爲進取計嘗試有司不合卽屏去益探六經百家之言務爲博瞻該詣雜又取老莊釋氏諸書采其理要貫穿融會折諸大中要本於吾儒修身養性之道自信而力行之其發于誠接于物者求諸古人或難焉鄉鄰化服翕然咸尊師之先生無它貲獨妻孥耕織以給伏臘弟子贄獻率資以惠人常居十九人有求貸者先生不能給爲更貸諸富家約以時償及期其人以宴告先生曰信可失乎賣田代償之棄其券不復問管適墅有遺金帛于路者爲守眎不去頸其還訪與之門人班忱親老子稱貧不能朝夕一女已及事先生爲辦裝具擇士壻之因以成家賴以婚娶者甚衆北鄰有喪由東戶出則犯禁

而衆不利南則鄰者忌之以西北則人居不可行先生曰世安有死而不得葬者葬而害衆寧獨及我壞其蠶室之壁出焉里中惡少嘗過門酌酒嫚罵先生恬無愠色復引之坐罵益甚久之始去明日惡少來謝先生爲避弗見或曰彼恃酒以逞謂宜少加責譙奈何反避之先生曰彼之來旣知過矣見之必重其媿是以避之惡少聞之感服更折節爲善先生之教人皆因其材而勉其可至凡所荅問得孔子教仁教孝之意或挾戶口見則就其所學而引之正有問以釋氏之戒定慧道家之攝生者則對曰易之寂然感通中庸之中無詩之思无邪若是者非定慧歟孔子語顏淵視聽言動勿以非禮非戒歟易之慎言語節飲食孟子之養心寡欲非攝生歟蓋未嘗深詆佛老而其徒頗自棄其學而歸焉先生立行不爲崖異有請焉無賢不肖必爲

之盡或怪其不擇曰善者吾獎之不善者吾勉之誠均入於善奚必擇故受業於門者人皆自以爲獨厚於已也先生沒門人議謚之皆曰先生之德所謂大醇者非耶乃名曰醇德於是進士楊好古以泰山□□李守純之狀與涿州軍事判官東平趙渢所錄遺事寔來

京師屬鄙文以表諸墓懷英昔者宦學山東是時東阿張子羽往平馬定國奉符王頤東平吳大方與其兄大年郭弼憲趙慤甲公綽諸公與先生相友善講論道義援據古今以孔孟所傳爲諸儒倡其後出者聞於朝處者行於鄉雖隱顯不同而先生之譽得友而章者已廣矣諸公相繼去世幾廿年先生獨無恙其力道益強傳道益宏信於人者益著士大夫聞先生之風過者必見居者必式焉石硤舊以安樂名鄉邑從事之賢者改曰

居賢著其行也先生有言君子得志則行道不得志則明道明
道者不必與邪說辯辯而勝猶激怒之其害道滋甚故曰孰將
問之寧自翼之孰將歐之寧自扶之邪說之勝久矣善爲道者
其在扶而翼之歟先生之道蓋與韓愈氏歐陽氏同所以行之
或異二子達而顯其用力易故剛以決先生窮而約其用力難
故順以化所遭者然也君子論其功與二子表裏云先生性恬
澹非書無所好晚歲構堂曰因拙日以名教自樂蓋得於性命
之說爲深死生之際泊如也大定廿四年十二月廿二日終于
家享年八十四先室宋氏再室甲氏二子曰守正守素皆好學
樂善不慕榮利得先生之志四孫長曰知進其三未名諸孤與
門人以明年正月廿五日奉先生之喪葬於三山先塋之側先
生前是用年得官九品及葬禮以其服禮也葬之日四方來會

者三千餘人既窆巨崖爲崩烏虜異哉銘曰

曲學搶攘道術裂 滔愚汨絳資剽斂 已潰不支矧可遏

或激其瀾益善決 惟韓歐陽道未溺 偉哉先牛復世出

所遭雖殊用則一 守經會異正途闢 有來歸之使順適

儒風振振被鄉邑 童口知書況成德 噫天生賢鮮遇合

惟窮而隱道乃集 嶽神川靈要終齋 劃然響阨應菱哲

三山舉如隱封鼠 不亡者存此其息 高風凜然世所式

以詒後人視茲石

大定二十五年冬十一月二十二日建 東平嘗深同弟潤

摹刊

右碑兩面刻文凡四十行字徑一寸王去非載金史隱逸傳全探此碑不增一語又案文藝傳趙沔字文孺東平人

工小篆與党懷英齊名但稱其官至禮部郎中未及涿州
軍事判官亦其畧也